

San Juan charo chũ'o tocha saosi'ea'me

*Jesucristo Puka'ku Dios pa'iche kuasi'ere
kuamũ*

¹ Chũkuna ñasi'ena'me asasi'e mũsanũkonani Jesucristo pa'iche'te kuaku ie chũ'o tocha saomũ chũ'u. Ũcuachi'a chũkuna Repau'te sũ'ka pojosi-naa'me.

Apereparumũ chuta'a cheja cho'omarumũ cunaumũre Puka'ku Diona'me paniasomũ Repau Jesucristo. Cunaumũ Pa'ikũji icheja chejare caje pa'iu re'oja'che pa'iche mai rekoñoã vajũche jo'kasi'kuamũ Repau. Ũcuachi'a chũkunani Puka'ku Dios pa'iche'te kuaku Repau chũ'uñe kuasi'kuamũ Repau. ² Repau Jesús kuache asaju Repau'terejẽ'e ñasinajeju masime chũkuna chura Puka'ku Dios pa'iche. Jã'ajekuna mũsanũkonare Jesucristo Puka'kuna'me Pa'ikũji mai pa'ichejare caje pa'iu maire ũcuanũkore re'oja'che che'choche asasinajeju ũcuare kuame chũkuna. ³ Ũcuachi'a Jesucristoji che'chokuna asasinajeju Dios pa'iche masime chũkuna chura. Repau'te ñasinajeju Dios pa'iche masiju Diona'me re'oja'che ja'me pa'ime chũkuna. Dios Mamaku'te Jesucristo'te ũcuachi'a re'oja'che ja'me pa'ime. Mũsanũkonapi asa chẽa chũkunana'me re'oja'che pa'iju ũcuachi'a Diona'me re'oja'che paapu chini chũkuna ñasi'e peore kuame chũkuna mũsanũkonare.

⁴ Musanukonapi ña na'a rua pojojũ paarũ chini tocha saomũ chũ'ũ ija'ova.

Dios re'oja'chechi'a cho'ochete kwamũ

⁵ Ie chũ'o chũkũna'te Jesucristo che'chokũna asasi'kũjekũ kwamũ chũ'ũ musanukonare. Ija'che che'chosi'kũa'mũ Repaũ:

“Dios peore masakũ'mũ. Re'okũjekũ cu'achejẽ'e peokũ'mũ.” Jã'aja'ñe chiũ pãi che'chosi'kũa'mũ Jesucristo. ⁶ Pãi, “Diona'me re'oja'che pa'ime chũkũna”, chiinapi cu'ache cho'oni chijachejaja'che cu'ache pa'inajejũ joreme repaña. Jã'aja'ñe cho'ona Dios chũ'ũñe cho'oma'me. ⁷ Repaũ Dios cu'achejẽ'e cho'oma'kũjekũ miañeja'ñe pa'iu re'oja'chechi'a cho'okũ jorema'kũa'mũ. Mai ũcuaja'che miañeja'ñe pa'ijũ re'oja'che cho'ojũ joremaneni sãinechi'a pojojũ pa'ijanaa'me. Ũcuachi'a Dios mai cu'a tũ'nesõkaija'mũ, Jesucristo maire jũni ro'ikaisi'ejekũna.

⁸ “Pãi ũcuauko cu'ache cho'onaa'me”, chiimũ Dios. Jã'ajekũna maipi, “Cu'ache cho'omanaa'me chũkũna”, chini joreme. Rũhiñe cuasamanajejũ Repaũ i'kache jachame mai jã'aja'ñe i'kani. ⁹ Jã'ata'ni maipi, “Cu'ache cho'onaa'me chũkũna”, chiijũ mai cu'ache cho'ochete Dioni kuato jo'e cuasamaneja'mũ Repaũ. “Jã'aja'ñe cho'oja'mũ chũ'ũ”, chiisi'kũjekũ jorema'ñe re'oja'chechi'a cho'omũ Dios. Jã'ajekũna mai cu'ache cho'ochete Repaũni kũaru mai rekoñoã pa'iche cu'a peore tũ'nesõkani jo'e cuasamaneja'mũ Repaũ. ¹⁰ Maipi, “Cu'ache cho'omanaa'me chũkũna”, chiito cu'amũ.

Jã'aja'ñe i'kani Dios i'kasi'ere jachajũ, “Joremũ Dios”, chiime mai.

2

Dios Raosi'ku Jesucristo maire sēekaikũ'mũ Pũka'ku Diore

¹ Mũsanũkonare chũ'ũ chĩijava'nare ie chũ'o mũsanũkonapi ña cu'ache cho'oma'ñe paapũ chini tocha saomũ chũ'ũ. Jã'ata'ni maipi cu'ache cho'oto Jesucristo Re'okũjekũ maire Repaũ Pũka'kũni sēekaimũ. “Ja'kũ, repa na cu'ache jo'e cuasamanejũ'ũ”, chiiũ sēekaimũ Repaũ. ² “Cu'ache cho'ona repa na cu'ache cho'osi'e ro'ijanaa'me”, chiimũ Dios. Jã'ata'ni Jesucristo mai cu'ache cho'osi'e ro'i jũni ro'ikakũna maire chura ro'iche peomũ. Jã'ata'ni mairechi'a ro'ikaima'ñe pãi ũcuauũkore ro'ikaisi'kũa'mũ Repaũ Jesucristo.

³ Maipi Diore masi cuasarepani Repaũ chũ'ũñe jachama'ñe cho'ome. ⁴ Jã'ata'ni pãi, “Diore cuasanaa'me chũkũna”, chiinapi Repaũ chũ'ũñe cho'omaneni joreme repa na, Dios chũ'o ũcuarepare asa chēamanajejũ. ⁵ Dios chũ'ũñe jachama'ñe cho'ona Diore masi cuasame. Jã'ajekũna maipi Repaũ chũ'ũñe'te cho'oni mai Repaũ'te masi cuasache masime. ⁶ Jesucristo cheja pa'irũmũ cu'achejẽ'e cho'oma'ñe re'oja'chechi'a cho'osi'kũa'mũ. Jã'ajekũna pãi, “Diore cuasanaa'me chũkũna”, chiinare, “Jesucristo pa'icheja'che re'oja'che pa'ijũ'ũ”, chiiũ chũ'vamũ chũ'ũ.

Pāi Dios chũ'usi'e asasinata'ni mamaja'ñe asajɯ pa'iche'te kuamɯ

⁷ Asarepajũ'u, chũ'u majapãijana. Ie chũ'o mɯsanɯkonani Dios chũ'usi'ere kuara chini tochamɯ chũ'u. Jã'ata'ni mamachũ'oma'mɯ ie. Aperumɯ mɯsanɯkona asasi'ea'me. ⁸ Jã'ata'ni mɯsanɯkona ie chũ'o asasinata'ni mamaja'ñe asajɯ pa'ime chura. "Chekunare ruɯ cuasajɯ oijɯ pa'ijũ'u", chiimɯ Dios. Ichejare caje pa'iu Jesucristo pãi ruɯ oiɯ pa'isi'kuɯ'mɯ. Jã'ajekuna maire ũcuaja'che cho'ojɯ paapu chini jo'kasi'kuɯ'mɯ Repau. Aperumɯ maire chijachejaja'che cu'ache pa'ijɯ vesujuna re'oja'che pa'icu'asi'kuɯ'mɯ. Chura Jesucristoji cho'okaiuna miañeja'ñe re'oja'che pa'ime mai.

⁹ Pãi, "Diore cuasanajejɯ miañeja'ñe re'oja'che pa'inaa'me chukuna", chiinapi repa na majapãijanani cuheni chuta'a chijachejaja'che cu'ache pa'ijɯ Diore cuasamanajejɯ chũ'ochi'a i'kame.

¹⁰ Repa na majapãijanare ña oinata'ni Diore masi cuasame. Ũcuachi'a Diore cuasanajejɯ miañeja'ñe re'oja'che pa'ijɯ cacu'ama'me repa na.

¹¹ Jã'ata'ni repa na majapãijanare cuhena Repauni masi cuasamarɯ ũcua chijachejaja'che cu'ache pa'ijɯ re'oja'che cuasachejẽ'e vesume repa na. Chijacheja ku'inaja'ñe pa'ivesujɯ na'ava'na pa'icheja'che pa'ime repa na.

¹² Mɯsanɯkona chũ'u chĩijava'na, Jesucristoni cuasajɯ rekoñoã cu'a tũ'nesõcojñorena iere chũ'o tocha saomɯ chũ'u. ¹³ Mɯsanɯkona aina, Jesucristo'te chuta'a cheja cho'omarumɯ Pa'ikuni masime. Mɯsanɯkona põsupãi, vati,

“Cu'ache cho'ojũ'ũ”, chiiche Dioni cuasajũ Ûcuauji cho'okaiũna jachajũ re'oja'che pa'ime.

¹⁴ Mũsanũkona chũ'ũ chĩijava'na, Mai Ja'kũre Dioni masi cuasajũ pa'ime. Mũsanũkona aina, chuta'a cheja cho'omarũmũ Pa'ikũ'te masime. Mũsanũkona pũsũpũi, Diopi cho'okaiũna re'oja'che pa'ime. Dios chũ'ũñe asa chẽasinajeju vati cu'ache chũ'ũtojẽ'e cu'ache cho'oma'ñe pa'ime mũsanũkona. Dioni cuasajũna chũ'o tocha saomũ chũ'ũ mũsanũkonare ũcuanũkore.

¹⁵ Diore cuasamana pa'icheja'che pa'imanejũ'ũ. Ûcuachi'a repaña cho'ochēja'che cu'ache cho'oñũ chiimanejũ'ũ. Jã'aja'ñe pañũ chiina Diore cuhenaame. ¹⁶ Diore cuasamana ija'che pa'ime: Cu'ache cho'oneejũ, chekũna nee tũa paachache ñajũ, “Chekũnare na'a rũa masinaame chũkũna”, chiiju cuasame. Repaña cu'ache pa'iche Dios jo'kasi'ema'mũ. Diore cuasamana cu'ache cuasajũ cho'ochẽ'me jã'a cu'a. ¹⁷ Cheja si'asũpi'ramũ. Na'a pa'isirũmũ cheja peoja'mũ. Ûcuaja'che cu'ache cho'ona peojanaame. Jã'ata'ni Dios chũ'ũñe cho'oneena Repaũ pa'ichejare ai sani si'arũmũ re'oja'che pa'ijanaame.

Dios chũ'o ũcuarepare che'chonana'me jorechũ'o che'chona pa'iche'te kũamũ

¹⁸ Asarepajũ'ũ, chũ'ũ chĩijava'na. Chura cheja si'apĩ'ramũ. Apeřũmũ mũsanũkona, “Jesucristo'te rũa cuhekũji raija'mũ”, chiiche asinaame. Chura Jesucristo'te cuhena pãĩ jainũko rani pa'ime. Repanapi rani pa'ijũna ña, “Cheja si'asũpi'ramũ”, chiime mai.

19 Repana Jesucristo'te cuhena maire ja'me jovo pa'isinapi Diore cuasamanajeju maire jo'ka sanisõsinaa'me. Maina'me Diore cuasana pani jo'ka saimana'asinaa'me repana. Jã'ata'ni repanapi jo'ka sanisõrena ña masiju, chekuna pãi, "Diore cuasamanaa'me jã'ana", chiime repanare.

20 Cristo mʉsanʉkonare ja'me paaʉ chini Dios Rekocho'te raosi'kua'mʉ. Ũcuarekochoji ja'me pa'iu cho'okaiuna Dios chʉ'o ũcuarepare masime mʉsanʉkona. 21 Dios chʉ'o ũcuarepa vesujuna tocha saoma'ñe, mʉsanʉkonapi ũcuare masijuna ie chʉ'o tocha saomʉ chʉ'u. Pãi chekuna te'ena, "Dios chʉ'o che'chonaa'me chʉkuna", chiiju jorechʉ'ore che'choju chʉ'o ũcuarepa che'choma'me. 22 Pãi Dios i'kasi'ere jachaju, "Dios Raosi'kuma'mʉ Jesús", chiina joreme. Jã'aja'ñe i'kaju jachaju Jesure Dios Raosi'kure cuheju Puka'ku Diorejatʉ'ka cuheme repana. 23 "Jesús Dios Mamakuma'mʉ", chini Jesuni cuasamana Puka'kure ũcuachi'a cuasama'me. Jã'ata'ni, "Jesús Dios Mamakuma'mʉ", chiiju Jesure cuasana Puka'kure Diore ũcuachi'a cuasame.

24 Mʉsanʉkona aperumʉ asa chʉasi'e Dios chʉ'ore jo'kasõma'ñe cuasaju pa'ijũ'u. Jã'aja'ñe jo'kama'ñe cuasaju pani Dios Mamakuna'me re'oja'che pa'ijanaa'me mʉsanʉkona. Ũcuachi'a Repaʉ Puka'ku Diona'me re'oja'che pa'ijanaa'me. 25 Repaʉ Jesucristo, "Mʉsanʉkona Dios pa'ichejare ai sani si'arumʉ pa'ijanaa'me", chiisi'kua'mʉ maire. 26 Chekuna pãi joreju cacʉ'oñu chiime mʉsanʉkonare. Repana jorena

pa'iche'te kũara chini ie chũ'o tocha saomũ chũ'ũ mũsanũkonare. ²⁷ Jesucristo mũsanũkonani ja'me paaũ chini Dios Rekocho'te raosi'kũa'mũ. Raonũna Repaũ Dios Rekocho mũsanũkonare jo'kasõma'ñe ja'me pa'iu jorema'ñe Dios chũ'o peore ũcuarepa re'oja'che che'chokũ pa'imũ mũsanũkonare. Jã'ajekũna mũsanũkona chekũnare che'chonare chiima'me. Dios Rekocho mũsanũkonare ũcuarepare che'chokũ, "Jesucristo'te cuasache jo'kasõmanejũ'ũ", chiiũ chũ'vamũ. Repa chũ'vache asa chẽa jo'kasõma'ñe cuasaju pa'ijũ'ũ.

²⁸ Asarepajũ'ũ, mũsanũkona chũ'ũ chĩijava'na. Maipi Jesucristo'te cuasache jo'kasõmaneni Repaũ icheja mai pa'ichejana jo'e cajerũmũ ña pojojanaa'me, Repaũ'te cuasache jo'kasõmanesinajejũ. Repaũ'te cuasache jo'kasõnita'ni Repaũ cajerũmũ ña vajũchũjũ katiñũ chijjanaa'me mai. ²⁹ Dios Mamakũ Jesucristo re'oja'chechi'a cho'okũ'mũ. Jã'are masini ie ũcuachi'a masime mai: Pãĩ re'oja'chechi'a cho'ona Dios chĩia'me, Jesucristo repanare cho'okaisi'ejekũna.

3

Diore cuasana Repaũ chĩijana pa'iche'te kũamũ

¹ Asarepajũ'ũ mũsanũkona. Mai Ja'kũ Dios maire rũa chiiũ, "Mũsanũkona chũ'ũ chĩia'me", chiimũ. Jã'ajekũna Dios chĩia'me mai. Pãĩ chekũna Diore cuasamana Dios pa'ichejẽ'e vesujũ ũcuaja'che mai pa'iche vesũme.

2 Asarepajũ'u chũ'u cuasana. Chura Dios chĩia'me mai. Mai pa'ijache chuta'a vesũme mai. Jã'ata'ni chura iere masime: Icheja mai pa'ichejana Jesucristoji jo'e ratu Repaũ pa'iche masirepa ñajanaa'me mai jã'arũmũta'ni. Ũcuachi'a Repaũni ña Ũcuajana carũhijanaa'me. 3 Jã'ajekũna mai Repaũ'te cuasana Repaũ jo'e rairũmũ Ũcuajana carũhijañere cuasajũ pojojũ cu'ache cho'oche ũhasõ Repaũ pa'icheja'che re'oja'che pa'ime.

4 Pãi cu'ache cho'ona Dios chũ'ũñe jachasõme. Cu'ache cho'oche Dios chũ'ũ jo'kasi'ema'mũ. 5 Jesucristo mai cu'ache cho'oche'te tũ'nesõkasa chini icheja mai pa'ichejare caje pa'ia jũni ro'ikaisi'kũa'mũ. Repaũ jmamakarũjẽ'e cu'ache cho'oma'kũa'mũ. Chura mũsanũkona masime jã'a. 6 Pãi Jesucristo'te masi cuasana cu'are jũvojũ re'oja'che pa'ime. Si'arũmũ cu'ache cho'ona Jesucristo pa'iche vesũme. Cu'are cho'ojũ Repaũ'te Jesucristo'te masi cuasama'me repaña.

7 Asarepajũ'u, chũ'u chĩijana. Pãipi mũsanũkonani jorechũ'ore che'chojũ cacũ'oñũ chiito repaña i'kachũ'o asa chẽamanejũ'u. Jesucristo re'oja'chechi'a cho'okũ'mũ. Jã'ajekũna pãi re'oja'che cho'ona Repaũ pa'icheja'che pa'ime. 8 Jã'ata'ni cu'ache cho'ona vati neena'a'me. Repaũ vati mamarũmũ cu'ache cho'okũ chuta'a irũmũjatũ'ka cu'ache cho'okũ pa'imũ. Jã'ajekũna Dios Mamakũ repaũ vati cu'ache cho'oche'te ũsera chini chejana cajesi'kũa'mũ.

⁹ Dios ch̄i, Repaṁ'te cuasana Dios Rekocho'te paajṁ si'areparṁṁ cu'ache cho'ojuṁ pa'ima'me. Repaṁ ch̄iijejuṁ cu'achejē'e cho'ocuheme repaṁa. ¹⁰ Pāi cu'ache cho'ona Dios ch̄iima'me, ũcuachi'a chekṁnare cuasamana. Jā'ajekṁna pāi cu'ache cho'ojuṁ chekṁnare oimanare ña, "Dios ch̄iima'me ina; vati ch̄ũ'ũñe'te cho'ome", chiire'omṁ.

Maire ũcuanṁkore pāi, "Chekṁnare oiju pa'ijũ'u", chiimṁ Dios

¹¹ Aperṁṁṁ Dios chṁ'o apeche'cherṁṁṁ Dios ch̄ũ'ũñe chekṁnapi che'chojuṁa asasinaa'me mṁsanṁkona. Ija'che che'chosinaa'me repaṁa: " 'Mṁsanṁkona pāi s̄iñechi'a oiju cuasajuṁ pa'ijũ'u', chiimṁ Dios maire ũcuanṁkore", chiiju che'chosinaa'me repaṁa. ¹² Aperṁṁṁ pa'isi'ku Caín jā'aja'ñe cho'oma'ñe cu'ache cho'okṁ paniasomṁ. Repaṁ cho'jeṁta'ni re'oja'che cho'okṁ paniasomṁ. Jā'ajekṁna majaa'chṁ Caín cho'jeṁ'te cuhekṁ vanisōasomṁ, vati cu'ache ch̄ũ'ũñe cho'okṁjekṁ. Repaṁ Caín pa'isi'eja'che pa'imaneñu mai. Re'oja'che pa'ijuṁ chekṁnare oiju pañu.

¹³ Asarepajũ'u, chṁ'u ch̄iijana. Chekṁna pāi Diore cuhena maire ũcuachi'a cuheme. Jā'ajekṁna, "¿Je'se pa'iṁna jā'ana maire cuheche?", chiiju cuasamanejũ'u mṁsanṁkona. Jā'aja'ñe cho'ome pāi maire Jesure cuasanare.

¹⁴ Pāi chekṁnare cuasamana ũcuachi'a Diore cuasama'me. Repaṁ'te cuasamana repaṁa j̄ūnisōsirṁṁṁ Dios pa'icheja saima'ñe vati toare ai sani uujṁ pa'ijanāa'me. Mai Diore

cuasanata'ni chekúnare oinajeju chura iere masime: Repau'te cuasanajeju Dios pa'ichejana ai sani mai re'oja'che pa'ijache. ¹⁵ Pãi chekúnare cuhena pãi vaina cuasache'te cuasame. Jūnisōsirumũ Dios pa'icheja saimanejanaa'me repana. Jã'a masime musanukona. ¹⁶ Jesucristo mai cu'ache cho'oche jūni ro'ikaisi'kajekũ maire oimũ. Masime mai jã'a. Jesucristo maire oicheja'che chekúnare oiju re'oja'che cho'okaiju pañu. Mai re'oja'che cho'oche'te ũseju chekúnapi pe'ruju maire vanisõñu chiitojẽ'e ũcua chekúnare re'oja'che cho'okaiju pañu. ¹⁷ Diore cuasana te'ena pōse karama'ñe paame. Chekúnata'ni Diore cuasana chuova'na pa'ime. Jã'ajekũna pōse paanare, "Chuova'na pa'inare ña oiju cho'okaijũ'ũ", chiimũ chu'ũ. Ña oima'to cu'amũ. Chuova'na pa'inani ña oimaneni Diore cuasanama'me repana.

¹⁸ Asarepajũ'ũ, chu'ũ chĩijana. Maipi, "Chekúnare oinaa'me chukũna", chiinata'ni repanare re'oja'che cho'okaima'to cu'amũ. Cho'omanapi i'kani peoche i'kame mai. Chekúnare oiju ũcuarepa re'oja'che cho'okaiju pañu mai.

"Dios cho'okaija'tũ chu'ũre", chini cuasaju vajuchũma'ñe Diore i'kache'te kũamũ

¹⁹⁻²⁰ Jã'aja'ñejekũna maipi pãi chekúnani oni, "Diore masi cuasanaa'me", chiire'omũ maire. Jã'ata'ni te'eñoã mai, "Dios chũ'ũñe si'areparumũ cho'oma'kua'mũ chu'ũ", chini oiju cuasame. Jã'ata'ni Dios peore Masiũ mai rekoñoã pa'iche peore Ñakũ mai Repau'te masi

cuasache ñamũ. ²¹ Maipi pãi chekunare oijũ pa'ito Diore vajuchuma'ñe sēere'omũ. ²² Ūcuachi'a maipi Repauni pojoju Repaũ chũ'uñe re'oja'che cho'ojũ maire uache'te sēeto re'oja'che ñsikũna koojanaa'me mai. ²³ Ija'chere chũ'umũ Dios maire: “Mũsanũkona chũ'u Neekũre Jesucristoni cuasajũ Repaũ chũ'uñe sãĩñechi'a cuhema'ñe cuasajũ pa'ijũ'u”, chiiũ chũ'umũ Dios maire. ²⁴ Pãi Dios chũ'usi'e cho'ona si'arumũ Ūcuauña'me re'oja'che pa'ime. Dios Rekocho maini ja'me paau chini Repaũ Raosirekochoji ja'me pa'iu, “Dios mũsanũkonare ja'me pa'imũ”, chiiũ kuakũna masime mai.

4

Diore cuasana cho'ochena'me Diore cuhena cho'ochete kuamũ

¹ Asarepajũ'u, chũ'u cuasana. Pãi mũsanũkonare, “Dios chũ'o che'chome chũkũna”, chiito repaña che'choche teana asamanejũ'u. Dios chũ'o ũcuarepa i'kato'te, repaña che'choche asajũ'u. Rũa jainũko jorechũ'o che'chona pa'ime ichēja cheja. ² Jesucristo ichēja cheja caje maija'iu pa'isi'kuamũ. Jã'are kuajũ che'chona Dios chũ'u jo'kasi'ere chũ'o che'chome. Mũsanũkonapi repaña che'choche'te asani, “Dios Rekocho paame ina”, chini repaña pa'iche cuasa masijanaa'me. ³ Repaña pãi, “Jesucristo Dios Raosi'kuamũ”, chiiju che'choni Dios Rekocho peome. Na'a pa'isirumũ Jesucristo'te rũa cuhekũji raija'mũ. Mũsanũkona repaũ raijache

asasinaa'me. Pãi te'ena repau cuasacheja'che cuasame chura pa'ina.

⁴ Asarepajũ'ũ, chu'ũ chĩijana. Vati Diore cuhenare paaku'mũ. Mũsanũkonata'ni Dios chẽa paacojñonajeju repanare cajejaimẽ, Diopi ja'me pa'iu cho'okaiũna. Vati na'a rũa masiku'mũ Dios. ⁵ Cu'ache che'chona vati neenaa'me. Jã'ajekũna repau chu'ũũũ'ũte i'kaju che'chojũna Diore cuhena pãi asaju pa'ime. ⁶ Pãi Diore cuasana chũkũna Repau raosina che'choche'te asaju pa'ime. Repau'te cuasamanata'ni asacuheme. Jã'ajekũna Dios chu'o asacuhenare ñani, "Diore cuasamanaa'me jã'ana", chiire'omũ. Jã'ata'ni pãi Dios chu'o asaneenare, "Diore cuasame ina", chini repana pa'iche'te ña masire'omũ maire.

Dios pãi ũcuanũkore oiche'te kũamũ

⁷ Asarepajũ'ũ, chu'ũ cuasana. ũcuanũko sãĩũechi'a cuasaju paũ mai. Jã'aja'ũ paapu chini chu'ũ jo'kasi'kũamũ Dios maire. Pãi chekũnare cuasana Dios chĩijeju Repau pa'iche masime. ⁸ Pãi ũcuanũkore oiku'mũ Dios. Jã'ata'ni pãi chekũnare cuasamana maire Oiku'te Diore cuasama'me. ⁹ Dios Repau Mamaku'te ũcuate'eũni chejana casosi'kũamũ, maipi Repauni cuasaju re'oja'che pa'iju mai jũnisũsirũmũ Dios pa'ichejare ai sani paapu chini. Jã'ajekũna maipi Dios Mamaku'te casosi'ere cuasani, "Dios maire rũa oimũ", chijũ cuasame mai. ¹⁰ Mai rekoũoã uache cuasaju chareparo Dioni cuasamanesinaa'me mai. Repau Dios maire rũa oikũjekũ Repau

Mamakũ'te chejana casõna caje pa'iu mai cu'ache cho'оче'te ro'ikaiũ chuenisõsi'kua'mũ Repau.

¹¹ Asarepajũ'ũ, chu'ũ cuasana. Dios maire rũa oiũna mai ũcuachi'a chekũnare rũa cuasajũ oijũ paũ. ¹² Pãi te'eujẽ'e Diore ñamanaa'me. Jã'ata'ni maire chekũnare cuasanare Dios ja'me pa'imũ. Jã'ajekũna maini Ũcuajji cho'okaiũna chekũnare si'arũmũ na'a rũa cuasajũ pa'ijanaa'me. ¹³ Dios maini ja'me paaũ chini Repau Rekocho'te raosi'kua'mũ. Ũcuarekochoji ja'me pa'iu cho'okaiũna Dios maire ja'me pa'iche masime mai. Ũcuachi'a mai Repaũna'me re'oja'che ja'me pa'iche masime.

¹⁴ Mai Ja'kũ Dios Repau Mamakũ'te chejana casosi'kua'mũ, Repau'te cuasanani Mamakũji chẽa paaku vati toa sani uuche'te ũsekaaũ chini. Chũkũna Repau'te Jesucristo'te cheja pa'irũmũ ñasinajejũ Repau pa'iche'te pãi ũcuanũkore kũajũ pa'ime, masia'jũ chini. ¹⁵ "Jesús Dios Mamakũ'mũ", chiinachi'a pãi Diona'me re'oja'che pa'ime. Ũcuachi'a Repau'te cuasanare jo'kama'ñe ja'me pa'imũ Dios.

¹⁶ Dios maire rũa oiche'te masijũ Repau'te cuasame mai. Pãi ũcuanũkore rũa oimũ Dios. Jã'ajekũna pãi chekũnare cuasache jo'kasõmana Diona'me re'oja'che pa'ijũna Repau repanare jo'kama'ñe ja'me pa'imũ. ¹⁷ Jesucristo Repau Pũka'kũre vajũchũma'ñe cuasamũ. Mai ũcuaja'che Repau'te Diore vajũchũma'ñe cuasajũ pa'ime, Repauji maini oiũna. Na'a pa'isirũmũ Dios pãi ũcuanũkore repaña cu'ache cho'osi'e ro'ia'jũ chini chũ'ũja'mũ. Maita'ni

Repau'te cuasaju Repau pa'icheja'che re'oja'che pa'inajeju vajuchumanejanaa'me reparumũ tĩ'ato. ¹⁸ Jã'ata'ni, "Dios maire cu'ache cho'oja'mũ", chiiju cuasani vajuchura'ame. Vajuchuju, "Dios maire oima'mũ", chiiju cuasara'ame. Jã'ata'ni, "Dios maire rua oikujeku cu'ache cho'omanaja'mũ", chini cuasaju Repau'te vajuchuma'ne cuasame.

¹⁹ Pãi te'eujẽ'e chuta'a Repau'te cuasamarumupi pãi ũcuanukore oiku'mũ Dios. Jã'ajekuna mai ũcuachi'a Repau'te maire charo cuasasi'kujekuna chura sãine cuasame.

²⁰ Pãi te'ena, "Diore cuasanaa'me chukuna", chiime. Jã'ata'ni repanapi chekunani majapãija'ne pa'inani cuheni jorenajeju peoche i'kame. Chekunare majapãijanare repañaanare cuhena, "Diore Ñoma'kureta'ni cuasame chukuna", chiina peoche i'kame.

²¹ Jesucristo maire ija'che chũ'u jo'kasi'kua'mũ: "Musanukona pãi Diore cuasana pani ũcuachi'a chekunare pãi cuasaju pa'ijũ'u". Jã'aja'ne chũ'u jo'kasi'kua'mũ Repau maire.

5

Diore cuasana Ũcuajji cho'okaiuna vati chũ'ũne si'arumũ cho'oma'ñere kumũ

¹ "Pãi ũcuanukore chũ'ua'ku chini Dios Raosi'kua'mũ Jesús", chini cuasana Dios chĩia'me. Dios chĩi chekuna Repau'te cuasanare mai Ja'ku Dios chĩijejuana cuasame.

² Maipi Dioni cuasaju Repau chũ'ũne cho'oni, "Chekunare Dios chĩi cuasame mai", chiire'omũ.

³ Maipi Dios chũ'ũne'te cho'oni Repau'te masi

cuasame. Ūcuauji maini cho'okaiuna Repau chũ'uñe cho'ovesama'mu maire. ⁴ Repau chii, "Dios maire oiũ cho'okaija'mu", chiiju cuasanajeju Ūcuauji cho'okaiuna vati chũ'uñe cho'oma'ñe re'oja'chechi'a cho'ome. ⁵ "Jesús Dios Mamaku'mu", chiiju cuasanachi'a koka paaju vati chũ'uñe cho'oma'ñe pa'ime.

Dios Mamaku pa'iche'te kuamu

⁶ Jesucristo icheja chejare caje pa'iu okorocojñosi'kuamũ. Na'a pa'iu mai cu'ache cho'oche'te ro'ikaiũ kurususẽ'verona jẽ'jo nukorena jũnisõ chie meosi'kuamũ. Dios Rekochoji ũcuarepare chũ'o kuakuna Jesús pa'iche masime mai. ⁷ Chotena cunaumu pa'ina, "Jesús Dios Mamaku'mu", chiiju kuame maire. Mai Ja'ku Dios Repau chũ'ore kuamu maire. Repau Mamaku ũcuachi'a kuamu. Repau Rekocho ũcuachi'a kuamu maire. Chotena ũcuate'ere chũ'o kuame maire. Jã'aja'ñe kuajuna masime mai Jesús pa'iche. ⁸ Ūcuachi'a chotemajña Repau cheja pa'irumu cho'osi'ere cuasaju Repau pa'iche masime mai. Repau'te Jesure okoroumucuse Dios Rekocho ũkupoja'iu cajesi'kuamũ. Cajeuna Dios cunaumuri ija'che i'kasi'kuamũ: "Chũ'u chĩia'mu mu'u", chiisi'kuamũ Dios. Na'a pa'iu Repau Jesús Dios Mamakujeku Repau chiepi mekuña jũni ro'ikaisi'kuamũ maire. ⁹ Pãipi ũcuauache i'kato repana i'kache'te asa cuasame mai. Jã'ajekuna Dios na'a rua masakũ i'kasi'e, "Ūcuarepaame", chiiju na'a rua cuasañu mai, Repau, "Chũ'u chĩia'mu Jesús", chiisi'e. ¹⁰ Dios Repau Mamaku

pa'iche kuasi'e pãi te'ena asa jachama'ñe cuasaju pa'ime. Chekunata'ni Dios kuasi'e asa jachaju, "Joremu Dios", chini, cuasama'me. ¹¹ Dios Repau Mamaku pa'iche'te kũaku ija'che i'kaasomu: "Chu'u chũire cuasanachi'a jũnisõsirumu chu'u pa'ichejare rani ai pa'ijanaa'me", chiniasomu Dios. ¹² Dios Mamaku'te cuasana jũnisõsirumu Dios pa'ichejare ai sani re'oja'che pa'ijanaa'me. Repau'te Dios Mamaku'te cuasamanata'ni vati toana ai sani uuju pa'ijanaa'me.

Cuhacho chu'vasi'ea'me

¹³ Musanukona Dios Mamaku'te cuasana jũnisõsirumu Dios pa'ichejare ai sani re'oja'che pa'ijanaa'me. Jã'are masiaju chini musanukonare ie chu'o tocha saomu chu'u. ¹⁴ Jã'ajekuna, "Dios maire cho'okaija'mu", chini masiju Repau chu'ũñe cho'ojũ maire uache'te sêeto asa, ïsimu Dios mai Repau'te sêeñe. Jã'are masiju vajuchuma'ñe maire uache sêeme mai Repau'te. ¹⁵ Dios mai sêeñe peore asamu. Jã'are masiju, "Mai sêeñe Dios cho'okaija'mu", chiiju masime mai.

¹⁶ Musanukonapi chekuna pãi cu'ache cho'ochete ñani Dioni sêekaijũ'u repanare. Dioni sêekaito repanare re'oja'che pa'iche cho'okaija'mu Dios. Jã'ata'ni repanapi cu'ache cho'ochete jmamakarujẽ'e ùhacuheto Dioni sêekaijũ'u repanare chiima'mu chu'u. Cu'ache cho'ochete ùhamanare jũnisõsirumu vati toana saoja'mu Dios, repana cu'ache cho'osi'ere ro'ia'ju chini. ¹⁷ Pãipi ùcuauache cu'ache cho'oto cu'amũ. Dios rua cuhemu jã'aja'ñe cho'ochete. Jã'ata'ni cu'ache cho'onapi repana

cu'ache cho'ochē'te ũhasõru Dios repāna cu'ache cho'osi'e tũnosõ jo'e cuasama'mũ.

¹⁸ Pãi Diore cuasana Repau chĩijeju si'areparũmũ cu'ache cho'ojũ pa'ĩma'me. Vati repānare Diore cuasanare cu'ache chũ'ũra chĩimũ, repānapi cu'ache cho'oa'ju chini. Jã'ata'ni Jesucristo Dios Mamakũji ũsekaiũna repāna cu'ache cho'oma'ñe pa'ime. Jã'are masime mai. ¹⁹ Pãi Diore cuhena vati chũ'ũñe'te cho'ojũ pa'ime. Maita'ni Dios chũ'ũñe'te cho'ojũ pa'inaa'me Repau neenajeju. Jã'are masime. ²⁰ Jesucristo, Dios Mamarepakũni Jesucristo'te caje pa'iu Pũka'ku pa'iche'te che'chosi'kua'mũ, pãipi Diorepau pa'iche'te masia'ju chini. Jã'are masime mai. Dios Mamarepakũni Jesucristo'te masi cuasanajeju Dios pa'ichejare ai sani pa'ijanaa'me mai. ²¹ Asarepajũ'ũ, chu'ũ chĩijana. Vati chũ'ũñe cho'oma'ñe pa'ijũ'ũ. Re'omũ.

Juan

Dios Chu'o Kuaphuro
Koreguaje: Dios Chu'o Kuaphuro New Testament
copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022
87a345ac-83c6-51ad-8750-17a703f38bcc